

漢丞相諸葛忠武侯集卷之二十七

便宜十六策

治國第一

治國之政其猶治家治家者務立其本本立則末正矣夫本者  
 倡始也末者應和也倡始者天地也應和者萬物也萬物之事  
 非天不生非地不長非人不成故人君舉措應天若北辰為之  
 主台輔為之臣佐列宿為之官屬眾星為之人民是以北辰不  
 可變改台輔不可失度列宿不可錯繆此天之象也故立臺榭  
 以觀天文郊祀逆氣以配神靈所以務天之本也耕農社稷山  
 林川澤祀祠祈福所以務地之本也庠序之禮八佾之樂明堂  
 道藏輯要 忠武侯集 十六策 九 星集三  
 辟雍高牆宗廟所以務人之本也故本者經常之法規矩之要  
 圓鑿不可以方枘鉛刀不可以砍伐此非常用之事不能成其  
 功非常用之器不可成其巧故天失其常則有逆氣地失其常  
 則有枯敗人失其常則有患害經曰非先王之法服不敢服此  
 之謂也

君臣第二

君臣之政其猶天地之象天地之象明則君臣之道備矣君以  
 施下為仁臣以事上為義二心不可以事君疑政不可以授臣  
 上下好禮則民易使上下和順則君臣之道備矣君以禮使臣  
 臣以忠事君君謀其政臣謀其事政者正名也事者勸功也君